

Dialog 1

vendidra	Bien di! Encuris Vus enzatgei special?
clienta	Gie, jeu enquerel ina giacca caulda pigl unviern.
vendidra	Bugen, tgei manegeis da quella giacca nera?
clienta	Hmmm, quella ei biala, mo jeu vess pli bugen ina giacca da colur.
vendidra	Secapescha. Tgei colur plai a Vus? Vi leu vessen nus ina biala giacca cotschna.
clienta	Tgietschen plai buc aschi bein a mi, mo schiglioc sun jeu aviarta per tut las colurs.
vendidra	Prima. Cheu vessen nus ina giacca blaua ed ina verda.
clienta	Oh gie, la blaua plai fetg bein a mi.
vendidra	Prima. Tgei grondezia veis Vus?
clienta	38.
vendidra	Bien. Cheu veis Vus ina en 38. Leis Vus empruar en ella?
clienta	Gie, bugen.
vendidra	Las cabinas ein vi leu.
clienta	Engraziel fetg!
vendidra	E lu, co va la giacca?
clienta	Ella sesa perfetg. Tgei manegeis Vus?
vendidra	Gie, quella giacca stat propi fetg bein a Vus! Ella ha il medem tun blau sco vos egls.
clienta	Jeu crei ch'jeu prendi ella.
vendidra	Super, quei ei ina buna decisiun.
clienta	Engraziel fetg, nua sai jeu pagar ella?
vendidra	La cassa ei vi leu.
clienta	Tiptop, engraziel fetg!
vendidra	Engraziel a Vus.

Dialog 2

Carla	Mira inaga quei t-shirt.
Tina	Tgeinin, il brin?
Carla	Na, il mellen.
Tina	Manegias che quel mondi a mi?
Carla	Gie, segir.
Tina	Mo quel va buc propi aprau cun mia rass' alva.
Carla	Gie, ti has raschun. Co fuss ei cun quella blusa violetta?
Tina	Oh gie, quella ei fetg biala, mo jeu sai buc, sche quella va a mi. Ella ei in tec pintga.
vendider	Sai jeu gidar Vus?
Tina	Gie, jeu empruass bugen quella blusa. Vesses Vus quella fors'era en numera 40?
vendider	Mo in pign mument. Jeu mirel.
	<i>Ina minuta pli tard:</i>
vendider	Nus vein quella blusa en Vossa grondezia, denton mo en clar verd.
Tina	Hmm ... Donn. Aber quella plai era fetg bein a mi. Jeu empruass bugen ella.
vendider	Gie naturalmein, las cabinas ein leu davos.
Tina	Engraziel fetg!
	<i>Avon la cabina</i>
Tina	Tgei manegias, Carla?
Carla	Wow, quella blusa ei sco fatga per tei.
Tina	Gie, jeu quetel era. Ed ella va era bein cun mia rassa alva. Jeu cumprel ella.
Carla	Tiptop! Quei ei ina buna cumpra.

Dialog 3

Eric	Wow, quei t-shirt ei uh cools. Astg'jeu ver quel, mumma?
mumma	Jeu sai buc. Quel ei bia memia gagls.
Eric	Fai schi bien, mumma. A mi plai quel!
mumma	Mira inaga contas colurs: tgietschen, mellen, verd, oransch, pinc e ner. Jeu hai mal ils egls da mirar sin quel. Vul buc pli bugen quei t-shirt stgir blau cun sdremas alvas?
Eric	Na, lez plai insumma buc a mi. Quel ei per pops.
mumma	E quei grisch vi leu?
Eric	Era buc. A mi plai mo quel cheu!
mumma	Ok, bien pia. Lu prendein nus quel.
Eric	Cool! Engraziel fetg, mumma!

Dialog 4

vendider	Bien di, sai jeu gidar Vus?
client	Gie. Jeu sun alla tscherca d'ina schlingia che va aprau cun quei lismer stgir verd.
vendider	Lein mirar... Cheu vessen nus ina biala schlingia grischa. Co plai quella a Vus?
client	Hmm, la colur ei empau lungurusa. Veis vus era colurs pli fermas?
vendider	Gie, cheu vessen nus ina schlingia cun in muster oransch-verd. Co plai quella a Vus?
client	Fetg bein! Exact quei ch'jeu hai encuretg. Quella prendel jeu.
vendider	Super! Duvreis Vus aunc enzatgei auter? Nus vessen aunc ina capetscha che va aprau cun quella schlingia.
client	Na, engraziel. Capetschas hai jeu avunda. Jeu prendel mo la schlingia.
vendider	Prima. Lu saveis Vus gest vegnir cun mei alla cassa.
client	Super. Engraziel fetg!

Dialog 5

Selina	Mario, mira inaga, jeu hai anflau in vestgiu per las nozzas da Sandra. Tgei dis ti da quel?
Mario	Gie, quel ei bials! Mo el ei ners, sco tut ils auters vestgius che ti has en scaffa.
Selina	Ner va adina. Ner ei elegant ed ha classa.
Mario	Gie, mo quei vestgiu cheu stess era bein a ti cun tes cavels stgirs.
Selina	In vestgiu mellen cun flurs violettas? Propi?
Mario	Gie. Emprova inaga! Ti vegns a veser!
Selina	Bien pia. Jeu emprovel el.
	<i>5 minutas pli tard</i>
Mario	E lu, co va la rassa?
Selina	Mira inaga!
Mario	Wow, bellezza! Quella colur ei perfetga per tei!
Selina	Gie, ti has raschun. Mo il vestgiu ei in tec memia gronds.
Mario	Spetga, jeu damondel la vendidra!
Mario	Perstgisei, vesses Vus quei vestgiu era en 38?
vendidra	Hmmm, jeu mon a mirar en nies deposit. Mo in mument.
	<i>2 minutas pli tard</i>
vendidra	Vus veis giu cletg. Jeu hai aunc anflau in.
Mario	Super, engraziel fetg!
	<i>5 minutas pli tard</i>
Mario	E lu co va il vestgiu?
Selina	El ei perfetgs! Quel prendel jeu.
Mario	Super! Lu savein nus uss finalmein ir a beiber in caffè.

Dialog 6

vendidra	Tgei vesses Vus bugen?
clienta	Jeu enquerel ina capetscha per mia figliola che ha dudisch onns.
vendidra	Tgei manegeis da quella capetscha pinca?
clienta	Jeu sai buc, sche quella color plai aunc ad ella. Pil mument preferescha ella colurs pli stgiras.
vendidra	Co fuss ei cun quella capetscha?
clienta	Gie. Quella ei speciala. A mi plai quei blau. E quels puncts brins silla capetscha van bein aprau culla color dils cavels da mia figliola. Jeu prendel quella. Nua ei la cassa?
vendidra	Leu davos las cabinas da sescumiar.
clienta	Engraziel fetg!
vendidra	Engraziel a Vus!